



REPUBLIKA E SHQIPËRISË
MINISTRIA E DREJTËSISË
DREJTORIA E NDIHMËS JURIDIKE FALAS
KOMISIONI I ANKIMIT

Nr. 560/15 prot.

Tiranë, më 31.03.2023

VENDIM

Nr. 14 datë 31/03/2023

“Për shqyrtimin e ankimit të organizatës jofitimprurëse “Qendra për mbrojtjen e të drejtave të fëmijëve në Shqipëri (CRCA)” ndaj Vendimit të Komisionit të Vlerësimit Nr. 9, datë 13.03.2023, për refuzimin e aplikimit për përfitimin e financimeve nga buxheti i shtetit për ofrimin e ndihmës juridike parësore të garantuar nga shteti”

Komisioni i Ankimit i përbërë prej:

Z. Erjon Ndreca - Kryetar
Znj. Migena Kazdeda - Anëtar
Znj. Arsilda Mamica - Anëtar

asistuar nga Sekretariati Teknik, sot, me datë 31.03.2023, mori në shqyrtim ankimin administrativ, për refuzimin e aplikimit për përfitimin e financimeve nga buxheti i shtetit për ofrimin e ndihmës juridike parësore të garantuar nga shteti, të organizatës **“Qendra për mbrojtjen e të drejtave të fëmijëve në Shqipëri (CRCA)”**, depozituar pranë Drejtorisë së Ndhmës Juridike Falas me datë 21.03.2023, Nr. 560/4 Prot, me të dhënat e mëposhtme:

ANKUES:

“Qendra për mbrojtjen e të drejtave të fëmijëve në Shqipëri (CRCA)”, përfaqësuar nga z. Altin Ilazizaj, Drejtor i Përgjithshëm.

OBJEKTI:

Ankimi ndaj Vendimit të Komisionit të Vlerësimit Nr. 9 , datë 13.03.2023, administruar nga DNJF, me Nr. 560/2 Prot, datë 13.03.2023, “Për aplikimin për financim të Organizatës Jofitimprurëse Qendra për mbrojtjen e të drejtave të fëmijëve në Shqipëri (CRCA)”.

BAZA LIGJORE:

Ligji Nr. 111/2017, datë 14.12.2017, “Për ndihmën juridike të garantuar nga shteti”;
Vendimi i Këshillit të Ministrave Nr. 110, datë 06.03.2019, “Për përcaktimin e procedurave të rregullave të përzgjedhjes së organizatave jofitimprurëse,

të autorizuar për ofrimin e ndihmës juridike parësore nga shteti, që përfitojnë financime nga buxheti i shtetit dhe mënyra e financimit të tyre”; Urdhri i Drejtorit të Përgjithshëm të DNJF nr. 5, datë 18.01.2022, “Për miratimin e metodologjisë mbi procedurat e financimit të Organizatave Jofitimprurëse të Autorizura nga Ministri i Drejtësisë”, i ndryshuar me Urdhrin nr. 5/1, datë 28/12/2022, “Për disa ndryshime dhe shtesa në Urdhrin nr. 5 datë 18.01.2022”.

Komisioni i Ankimit, pasi shqyrtoi pretendimet e ankuesit që ndër të tjera kërkon “rivlerësimin e aplikimit të CRCA, pasi është në përputhje me kërkesat e ligjit dhe VKM-së dhe shqyrtimin e aplikimit për financim të ndihmës juridike parësore falas të ofruar nga kjo organizatë”.

VËREN SE:

Referuar dokumentacionit të përcjellë në aplikimin e Organizatës Jofitimprurëse “Qendra për mbrojtjen e të drejtave të fëmijëve në Shqipëri (CRCA)”, rezulton se Komisioni i Vlerësimit për shqyrtimin dhe vlerësimin e aplikimeve për financim të organizatave jofitimprurëse të autorizuar nga Ministri i Drejtësisë, me Vendimin Nr. 9, datë 13.03.2023, **vendosi unanimisht refuzimin e aplikimit për financim.**

Pranë Komisionit të Ankimit në Drejtorinë e Ndihmës Juridike Falas me datë 21.03.2023, Nr. 560/4 Prot., është administruar ankimi i “Qendrës për mbrojtjen e të drejtave të fëmijëve në Shqipëri (CRCA)”, përfaqësuar nga z. Altin Hazizaj, Drejtor i Përgjithshëm.

Kundër Vendimit të Komisionit të Vlerësimit Nr. 9, datë 13.03.2023, në ankimin e tij me shkrim z. Hazizaj, përfaqësues i “Qendrës për mbrojtjen e të drejtave të fëmijëve në Shqipëri (CRCA)”, ka parashtruar se:

- i. Komisioni në vendimin e tij të arsyetuar është shprehur që kontratat e punës së stafit dhe ekspertëve të CRCA janë përcjellë në formatin fotokopje, ndërkohë që as në ligj dhe as VKM nr. 110, nuk ekziston askund e shkruar që dokumentet duhet të jenë të noterizuara, pasi në të vërtetë ligji dhe VKM nuk kërkojnë që të paraqiten kontratat e punës, por vetëm jetëshkrimet dhe përshkrimet e punës, të cilat nuk kanë nevojë të noterizohen, pasi nuk janë dokumenta me vlerë të veçantë.
- ii. Komisioni në vendimin e tij të arsyetuar është shprehur që pasqyrat financiare të vitit të fundit janë përcjellë të pakonfirmuara nga Drejtoria e Përgjithshme e Tatimeve, ndërkohë që pasqyrat financiare të organizatës kanë një karakter detyrues vetëm përkundrejt raportimit vjetor pranë zyrës së Tatim-Taksave dhe nuk kanë asnjë lidhje logjike apo juridike me ofrimin e ndihmës juridike parësore, e cila ofrohet falas. Gjithashtu kërkesa e shtuar në Udhëzues nga ana e DNJF për tu vulosur nga DPT, është një nonsense juridik, pasi vula e DPT nuk i shton vlefshmërinë juridike dokumentit në fjalë, i cili merret i mirëqenë vetëm po të ketë firmën dhe vulën e organizatës dhe përfaqësuesit juridik të saj. Udhëzuesi, ashtu si dhe kuptimi i fjalës, ka vlerë vetëm për të udhëzuar, por në asnjë moment, nuk është i detyrueshëm për t’u zbatuar.

Në vijim të këtyre pretendimeve, ankuesi ka kërkuar “rivlerësimin e aplikimit, duke e konsiderur dokumentacionin e percjellë nga ana e tyre në përputhje me kërkesat e ligjit dhe VKM-së si dhe shqyrtimin e aplikimit për financim të ndihmës juridike parësore falas të ofruar nga ana e tyre”.

Rrethanat faktike të çështjes,

Pranë Drejtorisë së Ndihmës Juridike Falas është administruar kërkesa e organizatës jofitimprurëse “Qendra për mbrojtjen e të drejtave të fëmijëve në Shqipëri (CRCA)”, protokolluar me Nr. 560 Prot., datë 01.03.2023, Organizata Jofitimprurëse ka aplikuar për financim nga Drejtoria e Ndihmës Juridike Falas për ofrimin e ndihmës juridike parësore të garantuar nga shteti.

Bazuar në kriteret e Vendimit të Këshillit të Ministrave Nr. 110, datë 06.03.2019, “Për përcaktimin e procedurave dhe të rregullave të përzgjedhjes së organizatave jofitimprurëse, të autorizuar për ofrimin e ndihmës juridike parësore të garantuar nga shteti, që përfitojnë financime nga buxheti i shtetit dhe mënyra e financimit të tyre” si dhe Urdhrit të Drejtorit të Përgjithshëm të DNJF nr. 5, datë 18.01.2022, “Për miratimin e metodologjisë mbi procedurat e financimit të Organizatave Jofitimprurëse të Autorizura nga Ministri i Drejtësisë”, i ndryshuar me Urdhrin nr. 5/1, datë 28/12/2022, “Për disa ndryshime dhe shtesa në Urdhrin nr. 5 datë 18.01.2022” organizata ka përcjellë dokumentacionin e poshtëshënuar:

- Formulari tip i aplikimit;
- Vërtetim mbi statusin aktiv të organizatës lëshuar nga DPT;
- Vërtetim për pagim detyrimesh lëshuar nga DPT;
- Bilance të dorëzuara në DPT;
- Statusi i Shoqatës “Qendra për mbrojtjen e të drejtave të fëmijëve në Shqipëri (CRCA)”;
- Deklaratë mbi numrin e personave të cilëve iu kanë ofruar ndihmë juridike në periudhën nëntor- janar 2023;
- Letra vlerësimi;
- Deklarata të konfliktit të interesave të punonjësve të organizatës;
- Vërtetim mbi realizim projekti me sukses dhe duke respektuar kushtet e kontratës përkatëse;
- Deklaratë e listëpagesës së kontributeve të sigurimeve shoqërore, shëndetësore dhe tatimit mbi të ardhurat nga punësimi;
- Urdhër pagesë mbi tatim burimin të mbajtur në burim;
- Ofertë Financiare;
- Inventari i paisjeve fizike (kompjuter; printera; tavolina; karrike etj.);
- Vërtetim nga Gjykata e Rrethit Gjyqësor Tiranë që organizata jofitimprurëse nuk është në proces gjyqësor me objekt :deklarim falimenti;
- Kontrata shërbimi dhe përshkrime pune të punonjësve të organizatës;
- Kontrata qeraje të ambienteve ku ushtron aktivitetin organizata;
- Vërtetim për kontributet e sigurimeve shoqërore dhe shëndetësore për tatimpaguesin;
- Deklarata mbi listëpagesat e kontributeve të sigurimeve shoqërore, shëndetësore dhe tatimit mbi të ardhurat nga punësimi;
- Numri i llogarisë bankare të organizatës;
- Certifikatë regjistrimi me Nr. NIPT/SSN;
- CV të punonjësve të organizatës;

- Urdhri Nr. 499, datp 27.09.2022 “Për autorizimin e Organizatës Jofitimprurëse (CRCA) në ofrimin e shërbimeve të ndihmës juridike parësore të garantuar nga shteti” të Ministrit të Drejtësisë;
- Vërtetim Gjyqësor nga Zyra e regjistrimit të OJF-ve;
- Vërtetim nga prokuroria dhe gjykata se anëtarët e organeve vendimmarrëse dhe përfaqësuesit ligjor të organizatës nuk janë në proces hetimi apo gjykimi për çështje që çenojnë besimin e publikut dhe ofrimin e përshtatshëm të ndihmës juridike;
- Foto të ambienteve dhe të vendodhjes ku ushtron aktivitetin organizata.

Komisioni i Vlerësimit pas administrimit të dokumentacionit të dorëzuar përmes aplikimit të Qendrës për mbrojtjen e të drejtave të fëmijëve në Shqipëri (CRCA)”, bazuar në Nenin 35 e vijues të Rregullores “Për organizimin dhe funksionimin e Drejtorisë së Ndihmës Juridike Falas”, të miratuar me Urdhrin e Ministrit Nr. 393, datë 23.11.2020, ka zhvilluar procedurat e mbledhjes së Komisionit dhe ka shqyrtuar dokumentacionin përkatës. Kjo referuar procesverbaleve të mbajtura nga Sekretariati Teknik pranë këtij Komisioni.

- Në vendimmarrjen përfundimtare, Komisioni i Vlerësimit ka arsyetuar se:
Përshkrimet e punës dhe kontratat e punës të punonjësve të organizatës janë përcjellë në formatin fotokopje;
Pasqyrat financiare të vitit të fundit të nënshkruara nga hartuesi i pasqyrave financiare dhe të nënshkruara nga drejtuesi i Organizatës, janë përcjellë të pakonfirmuara nga Drejtoria e Përgjithshme e Tatimeve.

Vlerësimi i Komisionit të Ankimit mbi procedurat e ndjekura në kuadër të aplikimit të “Qendrës për mbrojtjen e të drejtave të fëmijëve në Shqipëri (CRCA)” për përfitimin e financimeve nga buxheti i shtetit.

Në mbështetje të pikës 5 të VKM nr. 110, datë 6.3.2019, “Për përcaktimin e procedurave dhe të rregullave të përzgjedhjes së organizatave jofitimprurëse, të autorizuara për ofrimin e ndihmës juridike parësore të garantuar nga shteti, që përfitojnë financime nga buxheti i shtetit dhe mënyra e financimit të tyre”, Drejtoria e Ndihmës Juridike Falas ka ndërmarrë masat për publikimin në Buletinin e Njoftimeve Zyrtare të thirrjes për financimin e OJF-ve të autorizuara për ofrimin e ndihmës juridike parësore (Afati i aplikimit 31.01.2023-01.03.2023):

- Buletini nr. 6, viti 2023: <https://qbz.gov.al/cli/bujz/2023/6/95c6a821-3a21-4291-9c12-df4f471a4c24>

Gjithashtu, thirrja për financim është publikuar edhe në faqen zyrtare të Ministrisë së Drejtësisë, në rubrikën njoftime, si vijon:

- link: <https://drejtesia.gov.al/thirrjes-se-drejtorise-se-ndihmes-juridike-falas-per-financimin-e-organizatave-jofitimprures-te-autorizuara-per-ofrimin-e-ndihmes-juridike-paresore/>

Në këtë kuadër, me qëllim trajtimin e aplikimeve të paraqitura në afatet e mësipërme, në zbatim të VKM Nr. 110, datë 06.03.2019, me Urdhër të Ministrit të Drejtësisë Nr. 168 Prot., datë 13.02.2023, u ngrit Komisioni i Vlerësimit dhe i Ankimit.

Pranë Drejtorisë së Ndhmës Juridike Falas është administruar kërkesa e organizatës jofitimprurëse “**Qendra për mbrojtjen e të drejtave të fëmijëve në Shqipëri (CRCA)**”, protokolluar me Nr. 560 Prot., datë 01.03.2023, e cila rezulton e autorizuar nga Ministri i Drejtësisë me Urdhër Nr. 449, datë 27.09.2022. Kjo kërkesë rezulton e paraqitur brenda afatit të thirrjes (*Afati i aplikimit 31.01.2023-01.03.2023*).

Në vijim të trajtimit të këtij aplikimi, me Vendimin Nr. 9 datë 13.03.2023, Komisioni i Vlerësimit refuzoi aplikimin e organizatës jofitimprurëse “Qendra për mbrojtjen e të drejtave të fëmijëve në Shqipëri (CRCA)”.


Vendimi Nr. 9, datë 13.03.2023, iu komunikua organizatës nëpërmjet shërbimit postar me shkresën Nr. 560/2 Prot, me datë 13.03.2023. Sipas informacionit të marrë pranë shërbimit postar, organizatës i është komunikuar vendimi me datë 17.03.2023. Me shkresën e protokolluar pranë Drejtorisë me Nr. 560/4 Prot, datë 21.03.2023, organizata ka ushtruar të drejtën e ankimit.

Komisioni i Ankimit konstaton se ankesa e organizatës së depozituar me Nr. 560/4 Prot., datë 21.03.2023, është bërë brenda afatit pesë ditor të parashikuar në Pikën 16 të VKM Nr. 110, datë 06.03.2019.

Komisioni i Ankimit duke u bazuar në procedurat e mësipërme, mbi dokumentacionin e depozituar nga organizata, parashtrimet e paraqitura në ankim, dhe vendimmarrjen e Komisionit të Vlerësimit, konstaton se:

Bazuar në Pikën 2, të VKM Nr. 110, datë 06.03.2019, “*Për përcaktimin e procedurave të rregullave të përzgjedhjes së organizatave jofitimprurëse, të autorizuar për ofrimin e ndihmës juridike parësore nga shteti, që përfitojnë financime nga buxheti i shtetit dhe mënyra e financimit të tyre*”, rezulton se procedurat e përfitimit të financimit të organizatave jofitimprurëse të autorizuar janë bërë duke u bazuar në parimet:

- a) konkurrueshmërisë;
- b) trajtimit të barabartë dhe mosdiskriminimit të organizatave jofitimprurëse të autorizuar, aplikuese për përfitimin e financimit;
- c) transparencës të të gjitha fazave që lidhen me shqyrtimin, vendimmarrjen dhe përzgjedhjen e organizatave jofitimprurëse të autorizuar;
- ç) kriterëve të mirëpërcaktuar dhe publike, të cilat do të mundësojnë vlerësimin e propozimeve të organizatave jofitimprurëse të autorizuar në raport me objektivat dhe prioritetet e mbështetjes financiare;
- d) efektivitetit dhe ekonomizimit në shfrytëzimin e fondeve publike, duke siguruar që të arrihen objektivat dhe prioritetet e përcaktuara me një kosto sa më të favorshme për realizimin e shërbimit të synuar;
- dh) respektimit të plotë të parimeve të llogaridhënies dhe raportimit në përdorimet e fondeve publike;
- e) financimit të shërbimeve të ndihmës juridike parësore për kategoritë e përfituesve që janë me prioritet për Drejtorinë e Ndhmës Juridike Falas dhe në interes të përfituesve të ndihmës juridike parësore të garantuar nga shteti;
- ë) ruajtjes së pavarësisë së organizatës jofitimprurëse të autorizuar;
- f) parandalimit të konfliktit të interesit, si dhe të çdo aktiviteti tjetër që rrezikon ofrimin me integritet të ndihmës juridike të garantuar nga shteti



Në pikën 6, shkronja “b”, iv), të Vendimit të Këshillit të Ministrave Nr. 110, datë 06.03.2019 përcaktohet shprehimisht se: *“Për t’u kualifikuar për të përfitur financime, organizatat jofitimprurëse të autorizuar duhet të plotësojnë **kriteret e përgjithshme dhe të veçanta, përfshirë këtu edhe kërkesa të tjera specifike** që mund të jenë të nevojshme për ofrimin e ndihmës juridike parësore, sipas thirrjes publike të veçantë”*.

Këto kërkesa specifike, të cilat lidhen me prioritetet e kërkuara dhe targetin për secilin prioritet, janë përcaktuar në Urdhrin e Drejtorit të Përgjithshëm të DNJF nr. 5, datë 18.01.2022, *“Për miratimin e metodologjisë mbi procedurat e financimit të Organizatave Jofitimprurëse të Autorizura nga Ministri i Drejtesisë”*, i ndryshuar me Urdhrin nr. 5/1, datë 28/12/2022, *“Për disa ndryshime dhe shtesa në Urdhrin nr. 5 datë 18.01.2022”*.

Evidentohet se organizata në përputhje me Pikën 6 të VKM Nr. 110, datë 06.03.2019, *“Për përcaktimin e procedurave të rregullave të përzgjedhjes së organizatave jofitimprurëse, të autorizuar për ofrimin e ndihmës juridike parësore nga shteti, që përfitojnë financime nga buxheti i shtetit dhe mënyra e financimit të tyre”*, ka depozituar dokumentacionin e kërkuar, referuar të cilit, Komisioni i Vlerësimit në analizë përmbajtësore ka konkluduar në mosplotësimin e kriterëve të veçanta dhe të përgjithshme.

Dokumentacioni i percjellë nëpërmjet aplikimit të kryer nuk i përmbush kriteret e veçanta të përcaktuara në Urdhrin e Drejtorit të Përgjithshëm të DNJF nr. 5, datë 18.01.2022, *“Për miratimin e metodologjisë mbi procedurat e financimit të Organizatave Jofitimprurëse të Autorizura nga Ministri i Drejtesisë”*, i ndryshuar me Urdhrin nr. 5/1, datë 28/12/2022, *“Për disa ndryshime dhe shtesa në Urdhrin nr. 5 datë 18.01.2022”*, për shkak se kontratat e punonjësve dhe përshkrimet e punës së punonjësve janë percjellë në formatin fotokopje dhe jo të noterizuara, si dhe pasqyrat financiare të vitit të fundit janë percjellë të pa konfirmuara nga Drejtoria e Përgjithshme e Tatimeve.

Përsa i përket pretendimeve se: *“...dorëzimi i kontratave dhe përshkrimeve të punës të punonjësve të pa noterizuara nuk ekziston askund e shkruar që dokumentet duhet të jenë të noterizuara as në ligj dhe as në VKM-në nr. 110 datë 06.03.2019, pasi në të vërtetë ligji dhe VKM-ja nuk kërkojnë që të paraqiten kontratat e punës, por vetëm jetëshkrimet dhe përshkrimet e punës, të cilat nuk kanë nevojë të noterizohen, pasi nuk janë dokumenta me vlerë të veçantë...”*, vlerësojmë se ky pretendim **nuk qëndron pasi** në Urdhrin e Drejtorit të Përgjithshëm të DNJF nr. 5, datë 18.01.2022, *“Për miratimin e metodologjisë mbi procedurat e financimit të Organizatave Jofitimprurëse të Autorizura nga Ministri i Drejtesisë”*, i ndryshuar me Urdhrin nr. 5/1, datë 28/12/2022, *“Për disa ndryshime dhe shtesa në Urdhrin nr. 5 datë 18.01.2022”*, përkatësisht në Aneksin 1: Lista e dokumenteve të nevojshëm për aplikim (origjinale ose të njehsuara me origjinalin), përcaktohet qartë që: **përbën shkak automatik skualifikimi, percjellja e dokumentacionit në format jo origjinal ose të panjehsuar me origjinalin.**

Ky përcaktim përbën kriter të veçantë si dhe kërkesë specifike, diskrecion që legjislacioni ia njej Drejtorisë së Ndihmës Juridike Falas në kuptim të nenit 5 dhe 6 të Vendimit të Këshillit të Ministrave Nr. 110, datë 06.03.2019, ku përcaktohet shprehimisht se: *“Për t’u kualifikuar për të përfitur financime, organizatat jofitimprurëse të autorizuar duhet të plotësojnë **kriteret e përgjithshme dhe të veçanta, përfshirë këtu edhe kërkesa të tjera specifike** që mund të jenë të nevojshme për ofrimin e ndihmës juridike parësore, sipas thirrjes publike të veçantë”*.

Lidhur me pretendimin se; “...vendimmarrja e Komisionit të Vlerësimit konsiderohet si e padrejtë pasi pasqyrat financiare të organizatës kanë një karakter detyrues vetëm përkundrejt raportimit vjetor pranë zyrës së Tatim-Taksave dhe nuk kanë asnjë lidhje logjike apo juridike me ofrimin e ndihmës juridike parësore, e cila ofrohet falas...” vlerësojmë se ky pretendim **nuk qëndron pasi** referuar Aneksit 1 (**Lista e dokumenteve të nevojshme për aplikim**) të Metodologjisë së miratuar me Urdhrin e Drejtorit të Përgjithshëm të DNJF nr. 5, datë 18.01.2022, “Për miratimin e metodologjisë mbi procedurat e financimit të Organizatave Jofitimprurëse të Autorizuara nga Ministri i Drejtesisë”, i ndryshuar me Urdhrin nr. 5/1, datë 28/12/2022, “Për disa ndryshime dhe shtesa në Urdhrin nr. 5 datë 18.01.2022”, tek Kriteret e Veçanta (**Kapaciteti Financiar i Organizatës**) në pikën 8, përcaktohet si dokument për tu dorëzuar: “Pasqyrat financiare të vitit të fundit të nënshkuara nga hartuesi i pasqyrave financiare dhe të nënshkuara nga drejtuesi i Organizatës, duhet të jenë të konfirmuara nga Drejtoria e Përgjithshme e Tatimeve”.

Ky përcaktim përbën kriter të veçantë si dhe kërkesë specifike, diskrecion që legjislacioni ia njeh Drejtorisë së Ndhmës Juridike Falas në kuptim të nenit 5 dhe 6 të Vendimit të Këshillit të Ministrave Nr. 110, datë 06.03.2019, ku përcaktohet shprehimisht se: “Për t’u kualifikuar për të përfituar financime, organizatat jofitimprurëse të autorizuara duhet të plotësojnë **kriteret e përgjithshme dhe të veçanta, përfshirë këtu edhe kërkesa të tjera specifike që mund të jenë të nevojshme për ofrimin e ndihmës juridike parësore, sipas thirrjes publike të veçantë**”.

Rezulton se Organizata Jofitimprurëse “Qendra për mbrojtjen e të drejtave të fëmijëve në Shqipëri (CRCA)” ka përcjellë pasqyrat financiare të vitit 2021 të firmosura vetëm nga ekonomistja dhe administratori i Organizatës dhe të pa konfirmuara nga Drejtoria e Përgjithshme e Tatimeve.

Për sa argumentuam më lart Organizata Jofitimprurëse “Qendra për mbrojtjen e të drejtave të fëmijëve në Shqipëri (CRCA)”, përmes aplikimit të saj nuk ka plotësuar kriteret e veçanta dhe të përgjithshme të parashikuara në pikën 6 të kësaj VKM-je, e si pasojë kriteret e parashikuara në nenin 15 të ligjit nr. 111/2017 “Për ndihmën juridike falas”.

PËR KËTO ARSYE

Duke marrë në konsideratë faktin se bazuar në Pikën 16 të VKM-së Nr. 110, datë 06.03.2019, Komisioni i Ankimit ka në tagrin e tij vlerësimin e përputhshmërisë të procedurave të ndjekura nga Komisioni i Vlerësimit me parashikimet e këtij akti dhe jo themelin e vendimmarrjes.

Duke marrë në konsideratë faktin se ankimi i depozituar nga “Qendra për mbrojtjen e të drejtave të fëmijëve në Shqipëri (CRCA)”, ka të bëjë me themelin e vendimmarrjes dhe jo me anën procedurale, konkludojmë se trajtimi i objektit të ankesës del jashtë tagrit të Komisionit të Ankimit.

Mbështetur në rrethanat e faktit, hapat proceduriale të pasqyruara më lart, Komisioni konstaton se procedurat janë ndjekur në përputhje me Vendimin e Këshillit të Ministrave Nr. 110, datë 06.03.2019, “Për përcaktimin e procedurave të rregullave të përzgjedhjes së organizatave jofitimprurëse, të autorizuara për ofrimin e ndihmës juridike parësore nga shteti, që përfitojnë financime nga buxheti i shtetit dhe mënyra e financimit të tyre”; Rregulloren “Për organizimin dhe funksionimin e Drejtorisë së Ndhmës Juridike Falas”, të miratuar me Urdhrin e Ministrit Nr. 393,

datë 23.11.2020, dhe Urdhrin e Drejtorit të Përgjithshëm të DNJF nr. 5, datë 18.01.2022, “Për miratimin e metodologjisë mbi procedurat e financimit të Organizatave Jofitimprurëse të Autorizuara nga Ministri i Drejtësisë”, i ndryshuar me Urdhrin nr. 5/1, datë 28/12/2022, “Për disa ndryshime dhe shtesa në Urdhrin nr. 5 datë 18.01.2022”.

Në këto rrethana, bazuar në Pikën 17 dhe 18, VKM Nr. 110, “Për përcaktimin e procedurave të rregullave të përzgjedhjes së organizatave jofitimprurëse, të autorizuara për ofrimin e ndihmës juridike parësore nga shteti, që përfitojnë financime nga buxheti i shtetit dhe mënyra e financimit të tyre”, Komisioni i Ankimit unanimisht:

VENDOSI:

1. Mospranimin e ankimit të paraqitur nga Organizata Jofitimprurëse “Qendra për mbrojtjen e të drejtave të fëmijëve në Shqipëri (CRCA)”.
2. Kopje e këtij vendimi t’i njoftohet Organizatës jo më vonë se dy ditë nga marrja e vendimit.
3. Ngarkohet Drejtoria e Ndihmës Juridike Falas për njoftimin dhe publikimin e këtij vendimi sipas parashikimeve ligjore.
4. Kundër këtij vendimi ushtrohet ankim në Gjykatën Administrative kompetente, brenda afateve të parashikuara në legjislacionit në fuqi.

KRYETAR
Erjon Ndreca



ANËTAR
Migena Kazdeda



ANËTAR
Arsilda Mamica



U shpall në Tiranë,
me datë 31.03.2023.

Ky vendim hartohet në 5 (pesë) kopje.